

Qaffasinnerusumik ilinniartitaanerit pillugit Inatsisartut inatsisaannut Namminersorlutik Oqartussat nalunaarutaat

Matumuuna nalunaarutigineqarpoq qaffasinnerusumik ilinniartitaanerit pillugit Inatsisartut inatsisaat nr. 14 12. juni 2019-imeersoq allannguiteqarluni, Inatsisartut inatsisaat nr. 15, 1. december 2021-imeersup malitsigisaanik.

Kapitali 1

Atuuffia

§ 1. Inatsisartut inatsisaat una atuutissaq qaffasinnerusumik ilinniakkanut neqeroorutigineqartunut, Ilisimatusarfimmit, qitiusumik inuutissarsiutinillu ilinniarfiit aamma ilinniarfinnit allanit neqeroorutaasartunut.

Imm. 2. Qaffasinnerusumik ilinniagaq tassaavoq ilinniagaq annerusumik teoretiskiullunilu atuagarsorfiusoq, ilinniarnertuutut soraarummeeqqaarsimanissamik piumasaqaatitaqarfiusoq, tamatumunnga ilanngullugit immikkut aaqqissuussamik ilinniarnertuunngorniarnermik ingerlatsineq imaluunniit inuutissarsiummik ilinniagaqarneq, taamaattorli § 31 a tak. Qaffasinnerusumik ilinniakkanut ilaapput bacheloritut, kandidatitut-, ph.d.-tut, inuussutissarsiornermut akademimi, diplomitaarniarluni aamma masteritut ilinniakkat, tak. §§ 11-16.

§ 2. Naalakersuisut qaffasinnerusumik ilinniakkanik ataqtigiiakkaniq aaqqissuussissapput.

Kapitali 2

Ilinniakkat

Neqeroorutit aamma ilinniarfissanik aqutsineq

§ 3. Qaffasinnerusumik ilinniartitsinerit Ilisimatusarfimmit neqeroorutigineqarsinnaapput.

Imm. 2. Qitiusumik inuutissarsiutinillu ilinniarfiit aamma ilinniarfiit allat Naalakersuisunit akuerineqareernermik kingorna ilinniakkanik ingerlaqqiffiusunik neqerooruteqarsinnaapput. Qaffasinnerusumik ilinniakkat, qitiusumik inuutissarsiutinillu ilinniarfiit neqeroorutaat ilinniarfiup ilinniartitsissutigisartagaasa iluanniissapput.

Imm. 3. Naalakersuisut qaffasinnerusumik ilinniakkat neqeroorutigineqartnerat pillugu malittarisassanik aalajangersaasinnaapput, tamatumunnga ilanngullugit:

- 1) piffissaq tamaat piffissallu ilaani ilinniakkat neqeroorutaanersut,
- 2) ilinniakkat ungasianiit ilinniartitsinertut neqeroorutaasartut,
- 3) neqeroorutit akuersissutiginissaat akuersissutillu tunuartinneqarsinnaanerat,
- 4) ilinniartitsissutinik ataasiakkaanik neqeroortarneq aamma ilinniartitsissutinut aalajangersimasunut tunngatillugu pikkorissarnerit,
- 5) naammattusaammik immikkullu ilinniartitsinernik ingerlatsinerit, kiisalu
- 6) qaffasinnerusumik ilinniakkat ilaannik nunani allani ingerlatsisinnaneq.

§ 4. Naalakkersuisut qaffasinnerusumik ilinniakkant neqeroorutit akuerisinnaavaat:

- 1) ilinniagaq assingusoq Kalaallit Nunaanni ilinniarfinni allani neqeroorutigineqanngippat, taamaattoq tak. imm. 2,
- 2) ilinniakkap nunat tamat akornanni pitsaassusissanut pitsaassusissallu qularnaarnissaannut aalajangersagaasut piviusunngortissinnaappagit, taamaallilunilu angusat nuuneqarsinnaanerat, ilinniartunik paarlasseqatigiittoqarsinnaanera aamma nunat tamat akornanni akuerisaaneq anguneqarsinnaallutik.
- 3) suliffeqarnermi politikkikkut, aningasaqarnikkut aamma inuiaqatigiinermi isigniagassanut naleqqiullugu ilinniagaq pisariaqartinneqartutut isigineqarpat.

Imm. 2. Naalakkersuisut imm. 1-imi, nr. 1-imi aalajangersakkat sanioqqunneqarnissaat aalajangiussinnaavaat, ilinniakkap Kalaallit Nunaanni ilinniarfinni arlariinni neqeroorutigineqarnissaa pisariaqartinneqarpat, aamma

Imm. 3. Naalakkersuisut imm. 1 naapertorlugu akuersissuteqarnissamut atugassarititaasussanik aalajangersaasinnaapput.

§ 5. Ilinniarfiit qaffasinnerusumik ilinniakkant neqeroorutaasunit, ilinniartitsissutinik ataasiakkaanik aamma ilinniartitsissutinut aalajangersimasunut tunngatillugu pikkorissartitsinernik, Inatsisartut inatsisaat manna naapertorlugu neqeroorutaasunik, neqerooruteqarsinnaapput, taamaallaat ph.d.-tut ilinniagaq pinnagu.

§ 6. Ilinniarfiit naammattusaammik ilinniartitsinermik ingerlatsinissat, ilinniartunut qaffasinnerusumik ilinniakkami ilinnialersussatut akuerisaasunut, neqeroorutigisinnavaat, ilinniartut ilinniagassatigut ilinniakkap naammassinissaanut pisariaqartunik tunngavissinnissaat siunertaralugu.

§ 7. Ilinniarfiit ilinniartunut bacheloritut imaluunniit kandidatitut ilinniakkami ilinnialersussatut akuerisaasunut piginnaaneqarluartunut, ilassutitut ilinniartitsinernik ingerlatsinerit neqeroorutigisinnavaat.

§ 8. Ilinniarfiit nunani allani ilisimatusarfimmik ataatsimik arlalinnilluunniit imaluunniit ingerlatsivinnik allanik qaffasinnerusumik ilinniakkant neqerooruteqartartunik sulegateqarlutik, ilinniakkat immikkoortuisa ilaannik nunani allani ingerlatsinissaq neqeroorutigisinnavaat.

§ 9. Naalakkersuisut ilinniakkamik § 4, imm. 1 naapertorlugu neqerooruteqarnissamut akuersissummik tunuartitsisinnappa, ima pisoqartillugu:

- 1) ilinniakkap neqeroorutigineqarnissaa pisariaqartinnejunnaarpat,
- 2) ilinniakkamut pineqartumut tunngatillugu pitsaassusissamut piumasaqaatit qaqugukkulluunniit atuuttut ilinniakkap piviusunngortissinnaajunnaarpagut,
- 3) ilinniakkamut qinnuteqartartut amerlassusaat imaluunniit ilinniagaqartut naammassisartut amerlassusaat nukissatigut sillimmatigisanut ilinniakkamut atorneqartartunut naleqqiullugit naapertuukkunnaarsimappata, imaluunniit
- 4) Naalakkersuisut suliffeqarnermi politikkikkut, aningaasaqarnikkut aamma inuiaqatigiinnermi isiginiagassanut naleqqiullugu ilinniakkamik neqerooruteqarnerup killilerneqarnissaa pisariaqartutut isigippassuk.

Ilinniakkat imaat siunertaallu

§ 10. Qaffasinnerusumik ilinniakkat, tak. §§ 11-16, ilinniakkanik ingerlatsinerupput, European Credit Transfer System (ECTS) naapertorlugu aalajangersimasunik ECTS-pointillit.

Imm. 2. Piffissaq tamaat ilinniarnermik ingerlatsinerup ukiumi ataatsimi suliassartaasa assigaat 60 ECTS-point.

§ 11. Bacheloritut ilinniagaq tassaavoq ilisimatusarnermik tunngaveqartumik piffissaq tamaat ilinniagaq minnerpaamik 180 ECTS-pointinik naleqartoq, ilinniakkatut immikkoortutut, naammassisassatut ingerlanneqartoq. Ilinniartitaaneq ilinniartitaanerit pillugit ilinniakkat aaqqissugaaneri atorfinitissaasinaasumik bacheloritut ilinniarnertut taaneqarsinnaavoq, ilinniartitaaneq atorfinitissaasinaasumi aalajangersimasumi atorfinitissamik siunnerfeqarpat:

Imm. 2. Bacheloritut ilinniakkap siunertari:

- 1) ilinniartup ilinniartitsissummi ataatsimi amerlanerniluunniit ilisimatusarnikkut sammisassanik ilinniartinneqarnissaa, tamatumunnga ilanngullugit ilinniartitsissutip imaluunniit ilinniartitsissutit teoriivi periusaalu, tassuunakkut ilinniartoq ilinniakkamut tunngatillugu tamatigoortumik ilisimasaqalerlunilu piginnaaneqaleqqullugulu,
- 2) ilinniartup ilinniakkami ilisimasassanik aamma teoretiskimik periutsitigullu piginnaasanik pisinnaasanilu pissarsitinnissaa, tassuunakkut ilinniartoq nammineerluni ilinniartitsissutip iluani imaluunniit ilinniartitsissutit iluanni apeqqutinik assigiinngisitaartunik katitikkanik suussusilersuisinnaaleqqullugu, oqaasertalersuisinnaaleqqullugu naammassinnissinnaaleqqullugulu, aamma
- 3) ilinniartup inuutissarsiutini suliassanik ingerlatsisinnaalernissaanut aamma kandidatitut ilinniakkami ilinnialernissaanut tunngavissinnissaa.

§ 12. Kandidatitut ilinniagaq tassaavoq ilisimatusarnermik tunngaveqartumik piffissaq tamaat ilinniagaq minnerpaamik 120 ECTS-pointinik naleqartoq, ilinniakkatut immikkoortutut, naammassisassatut ingerlanneqartoq.

Imm. 2. Kandidatitut ilinniakkap siunertari:

- 1) ilinniartup ilinniagassatigut ilisimasaanik pisinnaasaanillu annertusaanissaq aamma teoretiskimik periutsitigullu piginnaasanik pisinnaasanilu kiisalu bacheloritut ilinniakkap killifianut naleqqiullugu nammineersinnaanermik annertusaanissaq,

- 2) ilinniartup ilinniartitsissummi imaluunniit ilinniartitsissutini sammisassani periutsinilu immikkoortunik annertusisanik atuineq aqqutigalugu ilisimasassatigut itisilerinissa, tamatumunnga ilanngullugit ilisimatuutut suliaqarnermik periutsinillu sungiusarneq, ilinniartup inuutissarsiutini suliassanik immikkut ilisimasaqarfunerusariaqartunik suliaqalernissaanik aamma ilisimatusarnikkut inerisaalluni sulanut peqataanissaanut piginnaanngortitsisumik, aamma
- 3) ilinniartup ingerlaqqilluni ilinniarnissaanut piginnaanngorsarnissa, tamatumunnga ilanngullugu ph.d.-tut ilinniagaq.

§ 13. Ph.d.-mi ilinniagaq tassaavoq ilisimatuutut ilinniarneq 180 ECTS-pointinik naleqartoq, nunat tamat akornanni angusassat nalingannut piginnaaneqalersitsisumik, ph.d.-tut ilinniartumik, namminersortut pisortallu ingerlatsiviini, ilisimatusarnermik tamatigoortumik ilisimasaqarnissamik piumasaqarfiusuni, nammineerluni ilisimatusarnermi, ineriertortsinermi aamma ilinniartitsinermi suliassanik ingerlatsisinaalersitsisoq. Ph.d.-tut ilinniarneq annerusumik ingerlanneqassaaq ilisimatusarnermik ingerlatsinikkut.

§ 14. Inuussutissarsiornermut akademimi ilinniagaq tassaavoq ilinniagaq ECTS-pointit 120-180-illu akornanni annertussusilik, ilinniakkatut immikkoortutut, naammassisassatut aaqqissuussaq, teorii sulinerlu paarlakaallugit ingerlanneqartoq.

Imm. 2. Inuussutissarsiornermut akademimi ilinniagaq piffissap ilaa ilinniakkatut 60 ECTS-pointinik naleqartutut teoretiskiinnaasutullu neqeroorutigineqarsinnaavoq, ilinniartoq minnerpaamik ukiuni 2-ni inuussutissarsiummik naapertuuttumik misilittagaqaqpata.

§ 15. Diplomitaarniarluni ilinniagaq tassaavoq, inuutissarsiummik aamma suliamik tunngavilimmik qaffasinnerusumik ilinniagaq 60 ECTS-pointinik naleqartoq.

§ 16. Masteritut ilinniagaq tassaavoq ilinniagaq ilisimatusarnermik tunngavilik 60 ECTS-pointinik naleqartoq, ilinniakkatut immikkoortutut, naammassisassatut ingerlanneqartoq.

Imm. 2. Masteritut ilinniakkap siunertaraa ilinniartup inuutissarsiutini sulinermik misilittagaqaareersup aamma ilinniakkamik tunuliaqtaqartup ingerlaqqifflusumik ilinniagaqarnissaa, immikkut ilinniakkap iluani, imaluunniit siamasinnerusumik siunnerfeqarluni ilikkagassap ataatsip iluani imaluunniit ilikkagassat arlaqartut iluanni.

Ilinniakkat aaqqissugaaneri

§ 17. Inatsisartut inatsisaata matuma sinaakkusiussaasa iluanni, ilinniarfiit ilinniakkat pillugit malittarisassat erseqqinnerusut aalajangersassavaat, ilinniakkani tamani ilinniakkap aaqqissugaanerata allaaserineratigut, ph-d-tut ilinniagaq kisiat pinnagu. Ilinniakkat aaqqissugaaneri aamma kingusinnerusukkut taakkunani allannguutit annertunerusut Naalakkersuisuni tusarniaassutigineqassasut, taakku ilinniarfearfimmit aalajangersarneqarnissaat sioqqullugu.

Imm. 2. Ilinniakkat aaqqissugaaneri ilinniakkanut ataasiakkaanut naleqqussagaassapput, paasisuttissanillu ilinniakkamut pingaaruteqartunik imaqqassallutik. Ilinniakkanut naleqquttuussusia aallaavigalugu ilinniakkat aaqqissugaanerisa makku imarissavaat:

- 1) Ilinniakkap taaguutaa kalaallisut, qallunaatut aamma tuluttut.
- 2) Ilinniakkap annertussusiligaanera ECTS-pointinik nalunaarlugu.
- 3) Ilinnialernissamut piumasaqaatit, qinnuteqartut ilinniakkami inissaqartinnejartunit amerlanerutillugit qinnuteqartunik tulleriaarinissamut malittarisassat, aamma qinnuteqarnissamut killiliussat.
- 4) Ilinniakkap ilinniagassatigut ilisarnaatai, makkunangna ersersitsisut:
 - a) ilinniakkap siunertaa,
 - b) ilinniakkami ilinniartitsissutit, aamma
 - c) ilinniakkami ilikkagassatigut pissarsiassat.
- 5) Immikkoortukkaat pillugit malittarisassat, ilikkagassani immikkoortutut aamma ilikkagassat toqqagassat, tamatumunnga ilanngullugit:
 - a) ilisimaligassatut, pisinnaaligassatut piginnaasaqarfingiligassatullu iluseqartillugit ilikkagassatigut pissarsiassat,
 - b) annertussusaa ECTS-pointitut nalunaarsorlugu,
 - c) ilinniartitseraatsit suleriaatsillu, aamma
 - d) peqataanissamut piumasaqaatit.
- 6) Allattariarsorluni suliassat pillugit malittarisassat, tamatumunnga ilanngullugit bacheloritut suliassaq aamma speciali.
- 7) Soraarummeernerit pillugit malittarisassat.
- 8) Sungiusarluni sulinerit pillugit malittarisassat.
- 9) Nunani allani ilinniarnerit pillugit malittarisassat.

10) Ilinniartup piffissaq ilinniarfissaq sivisunerpaq, immikkut akuerineqarnissamut periarfissat ilinniarunnaarnerlu pillugit malittarisassat.

11) Ilinniariikkanik nuutsitsisinnaanermut malittarisassat.

Imm. 3. Ilinniakkat aaqqissugaaneri ukiup ilinniarfiusup aallartinneraniit atortuulertassapput. Ilinniakkat aaqqissugaaneri, ilinniartunut ukiup ilinniarfiusup tulliani aallartittussanut atuuttussat, ilinniarfiup nittartagaani tamanut saqqummiunneqareersimassapput piffissaq qinnuteqarnissamut killiliussaq, § 19, imm. 1 aamma 2-mi aalajangersarneqartoq, nallertinnagu.

Imm. 4. Ilinniartut ilinniakkamik aallartitsereersut, ilinniakkap aaqqissugaanera ilinniarnerup aallartinnerani atuuttoq malissavaat. Ilinniakkap aaqqissugaanera allanngortinnejartillugu, ilinniartoq ilinniarnermi ingerlanerani ilinniakkap aaqqissugaaneranut nutaamut nooqqullugu peqquneqarsinnaanngilaq,

Imm. 5. Naalakkersuisut ilinniakkat aaqqissugaaneri pillugit malittarisassaliorssinnaapput, aamma piffissaq ilinniarfissaq sivisunerpaq pillugu malittarisassat.

Ilinniarnermut ileqqorissaarnermullu malittarisassat

§ 17 a. Ilinniarfiup pisortaata ilinniarnermut ileqqorissaarnermullu malittarisassat aalajangersassavai, taamaattorli imm. 3 tak. Ilinniarfiup pisortaata ilinniarnermut ileqqorissaarnermullu malittarisassat ilinniartunut ilisimatitsissutigissavai. Ilinniarfimmi pisortap ilinniarnermut ileqqorissaarnermullu malittarisassat ilisimatitsissutit Naalakkersuisunut nassiutissavai.

Imm. 2. Ilinniarfimmi pisortaq ilinniartunut ilinniarnermut ileqqorissaarnermullu malittarisassanik maleruaanngitsunut pineqaatissiinissaq pillugu aalajangiissaaq. Ilinniarfimmi pisortap ilinniartut,

ilinniarnermut ileqqorissaarnermullu malittarisassanik arlaleriarlutik sakkortuumilluunniit unioqqutitsisut anisisssinnaavai.

Imm. 3. Naalakkersuisut ilinniarnermi pissuserissaarnissamillu malittarisassat pillugit malittarisassanik erseqqinnerusunik aalajangersaassapput, tamatumunnga ilanngullugit pinngitsoorani takkuttussaaneq aamma ilinniartunut ilinniarnermi pissuserissaarnissamillu malittarisassanik maleruaanngitsunut pineqaatissiisarnissat pillugit malittarisassat.

Pitsaassutsimik qularnaarineq

§ 18. Ingerlaqqiffiusumik ilinniakkat ataasiakkaat pitsaassutsimikkut qularnaarneqassapput, nunat tamat akornanni aalajangersakkat naapertorlugit.

Imm. 2. Naalakkersuisut pitsaassutsimik qularnaarineq pillugu malittarisassiussapput.

Kapitali 3

Qinnuteqarneq aamma ilinnialernissamut piumasaqaatit

Qinnuteqarneq

§ 19. Ingerlaqqiffiusumik ilinniakkanut augustimi imaluunniit septemberimi aallartittussanut qinnuteqarnissamut killigititaq tassaavoq 1. marts, taamaattoq tak. imm. 2.

Imm. 2. Ilinniarfiit qaffasinnerusumik ilinniakkanut ataasiakkaanut tunngatillugu aalajangersinnaapput, ilinniartunik upernaakkut semesterimi aallartittussanik ilinnialertussatut akuersiniarlutik. Upernakkut semesterimi ilinniarfiit aallartittussanut qinnuteqaateqartitsineremi ilinniartunngortitsinermilu periutsit, tamatumunnga ilanngullugit qinnuteqarnissamut akissuteqarnissamullu killiliussat, malittarisassat ilinniarfiup aalajangersagai nittartakkatigullu tamanut saqqummiussai malillugit pisassapput.

Imm. 3. Qinnuteqarnissamut killiliussaq, tak. imm. 1 aamma 2, ilinniakkat ataasiakkaat aaqqissugaaneranni aamma ilinniarfiup nittartagaani ersarissumik takuneqarsinnaassaaq.

Imm. 4. Ilinniarfiit qinnuteqaatinik kingusinaartumik annguttoqartillugu, qinnuteqarnissamut killiliussaq saneqqussinnaavaat, tak. imm. 1 aamma 2, pissutsit immikkut ittut tamanna pisariaqalersippassuk.

§ 20. Qaffasinnerusumik ilinniakkamut ilinnialerumalluni qinnuteqarneq, periaasissat Naalakkersuisunit innersuunneqartut naapertorlugit pisassaaq, tak. imm. 2.

Imm. 2. Naalakkersuisut qinnuteqaateqarnermi periaasissat, ilusiliussassatut piumasaqaatit aamma teknikkikkut periarfissat innersuutissavaat tamannalu ilinniarnermik ilitsersuinerit pillugit nittartakkani naapertuuttuni saqqummiutissallugu.

Imm. 3. Imm. 1 malillugu qinnuteqaatinut ilinniakkamut ilinnialerfissatut qinnuteqarfisgamut ingerlariaqqissutaasinnaasutut uppernarsaatit ilanngunneqassapput, taamaattorli § 31 a tak. § 19, imm. 1 aamma 2-mi qinnuteqarnissamut killiliussat naaneranni, ilinnialernissamut tunngavigisat uppernarsaataat pissarsiarineqarsimangippata, uppernarsaatit malinnaatillugit nassiunneqassapput ilinniarfiup tamatumunnga killiliussaata iluani.

Imm. 4. Soraarummeersimanermut uppernarsaatit il.il, ilinnialerumalluni qinnuteqarnermi nassiunneqartut kalaallisut, qallunaatut, Nunat Avannarliit allat oqaasii atorlugit imaluunniit tuluttut

allagaanngitsut, oqaatsit pineqartut arlaannut ataatsimut nutserneqarsimanissaat pillugu ilinniarfik malittarisassanik aalajangersaasinhaavoq.

Imm. 5. Qinnuteqaatit, tamatumunnga ilanngullugit qaffasinnerusumik ilinniakkamut qinnuteqaatit ilinnialernissarlu pillugu attaveqaqtiginnerit, tamakkiisumik ilaannakortumilluunniit digitaliusumik pisassanersut, tamatumunnga ilanngullugu digitaliusumik aaqqissuussinerit aalajangersimasut pinngitsoorani atorneqarnissaat qularnaatsumillu kinaassutsimik ilisarsisoqarsinnaanissaa pillugit Naalakkersuisut malittarisassanik aalajangersaasinhaapput.

Ilinnialernissamut piumasaqaatit

§ 21. Bacheloritut ilinniakkami ilinnialernissamut piumasaavoq ilinniarnertuunngorniarfimmi ilinniarsimaneq, tamatumunnga ilanngullugit immikkut aaqqissuussamik ilinniarnertuunngorniarnermik ingerlatsineq, ilinnialernissamut immikkut piumasaqaatinik naammassinninneq, tak. § 22, kiisalu karakteeritigut piumasaqaataajunnartunik piviusunngortitsisinnaaneq, tak. § 23.

Imm. 2. Aamattaaq ilinnialernissamut piumasaqaataasinnaavoq, malittarisassat ilinniarfiup aalajangersagai naapertorlugit qinnuteqartup ilinnialernissamut misilitsinnermi angusisimanissaa.

§ 22. Ilinnialernissamut immikkut piumasaqaatit tassaapput ilinniarnertuunngorniarfimmi ilinniartitsissutit aalajangersimasut killiffik A-, B-, imaluunniit C-miittut, tak. ilinniarnertuunngorniartarneq pillugu lnatsisartut inatsisaat.

Imm. 2. Ilinniartitsissutip aalajangersimasumik qaffasissuseqarnissaa piumasaappat, tak. imm. 1, qinnuteqartup ilinniartitsissutini angusinissamut killigititaq, killiffimmi tassani qaffasinnerusumiluunniit angusimassavaa, ilinniarnertuunngorniarfimmi pineqartumi karakteeriliisarneq pillugu malittarisassat naapertorlugit. Ilinniartitsissummi karakteerit arlallit ilaappata, karakteeritigut piumasaqaat naammassineqarsimassaaq agguaqatigiissitsinermi pingartitaq anguneqarsimappat. Karakteeritigut piumasaqaat naammassineqarsinnaanngilaq qummut akunnaalliliinikkut.

§ 23. Karakteeritigut piumasaqaat ima paasineqassaaq, ilinnialissutaasinnaasumik soraarummeerneq naammassineqarsimassasoq, ilinniarnertuunngorniarfimmi pineqartumi karakteeriliisarneq pillugu malittarisassat naapertorlugit, agguaqatigiissitsinermi karakteeri aalajangersimasoq minnerpaatut karakteereralugu, imaluunniit ilinniartitsissutit ataasiakkaat angusiffiusimassasut karakteerip minnerpaaffissaa aalajangersimasoq karakteereralugu. Piumasaqaat naammassineqarsinnaanngilaq qummut akunnaalliliinikkut.

§ 24. Iliniakkanut ataasiakkaanut ilinnialernissamut piumasaqaatit aalajangersimasut aamma karakteeritigut piumasaqaatit, tak. §§ 22 aamma 23 ilinniarfinnit ataasiakkaanit aalajangersarneqassapput.

Imm. 2. Ilinniarfit aalajangersinnaavaat, misilitsinnermi ilinniarfimmit immikkut aaqqissuussaasumi angusaq, aammalu assingusunik piginnaaneqarnermik upternarsaasoq, qinnuteqartunut § 23 naapertorlugu karakteeritigut piumasaqaammik naammassinninngitsunut, karakteeritigut piumasaqaatinik naammassinninnertut naleqartinneqarsinnaasoq.

Imm. 3. Ilinniarfik § 23-mi karakteeritigut piumasaqaammik saneqqutsisinnaavoq, pissutsit immikkut ittut tamanna pisariaqalersippassuk.

§ 25. Bacheloritut ilinniagaqarumallutik qinnuteqartut, ilinnialernissamut piumasaqaatitut aalajangiunneqartunit, tak. § 21, allaanerusumik tunngaveqarlutik qinnuteqarnissaat ilinniarfiup akuerisinhaavaa, qinnuteqartoq piumasaqaatinut sanilliunneqarsinnaasunik ilisimasassatigut piginnaaneqarpat, ilinniarfiullu nalilerpagu qinnuteqartup ilinniagaq naammassisinnaassagaa.

Imm. 2. Ilinniarfiup imm. 1 naapertorlugu akuersinissaminut piumasarisinnaavaa, qinnuteqartup kingusinnerpaamik ilinniarnerup aallartinnerani naammattusaammik misilitsinnermi anguseeqqaarnissaa, piginnaanerit pisariaqartut uppernarsarumallugit.

§ 26. Kandidatitut ilinnialernissamut piumasaavoq, naapertuuttumik bacheloritut ilinniagaqarnissaq, tak. § 11, imm. 1, imaluunniit naapertuuttumik allamik, assingusumik qaffasissusilimmik Kalaallit Nunaanni, Danmarkimi nunamiluunniit allami ilinniagaqarsimanissaq.

Imm. 2. Ilinniarfiup kandidatitut ilinniakkani ataasiakkaani ilinnialernissamut piumasaqaatit aalajangersassavai.

Imm. 3. Kandidatitut ilinniagaqarumallutik qinnuteqartut, imm. 1-im i ilinnialernissamut piumasaqaatitut aalajangiunneqartunit allaanerusumik tunngaveqarlutik ilinnialernissaat ilinniarfiup akuerisinhaavaa, qinnuteqartoq piumasaqaatinut sanilliunneqarsinnaasunik ilisimasassatigut piginnaaneqarpat, ilinniarfiullu nalilerpagu qinnuteqartup ilinniagaq naammassisinnaassagaa. Ilinniarfiup aalajangersinnaavaa, qinnuteqartup kingusinnerpaamik ilinniarnerup aallartinnerani naammattusaammik misilitsinnermi anguseeqqaarnissaa, imaluunniit ilinniartitsissutinik naammattusaataasunik ingerlatseqqaarnissaa.

§ 27. Ph.d.-tut ilinnialernissamut piumasaavoq qinnuteqartup, ilinniakkamik qaffasissutsimigut kandidatitut ilinniakkamut nallersuunneqarsinnaasumik ilinniagaqarsimanissa, tak. § 12, imm. 1.

Imm. 2. Ilinniarfiup aalajangersinnaavaa ph.d.-tut ilinniarnermk ingerlatsineq kandidatitut ilinniarnerup ingerlanneranut atasumik aallartinneqarsinnaasoq, kisianni qularnaarneqassaaq ilinniarnerup tamarmiusup, ilinniakkat marluk uiuleriissillugit ingerlanneqarnerat, annertoqatigalugulu qaffaseqatigigaa, tak. §§ 12 aamma 13.

Imm. 3. Ilinniarfiup aalajangissavaa kikkut ph.d.-tut ilinnialissanersut. Ilinniarfiup nittartagaani ersissaq, ilinnialernissamik akuersinermut piumasaqaatit suut tunngaviussanersut.

§ 28. Inuussutissarsiornermut akademimi ilinniakkami ilinnialernissamut piumasaavoq ilinniarnertuunngorniarfimmi ilinniarnermk naammassisimanissaq, tamatumunnga ilanngullugit immikkut aaqqissuussamik ilinniarnertuunngorniarnermk ingerlatsineq imaluunniit inuutissarsiummik ilinniagaqarneq, tak. inuussutissarsiutinik ilinniartitsinerit aamma inuussutissarsiutinik ilinniartitsinerit iluanni pikkorissartitsarnerit pillugit lnatsisartut inatsisaat. Ilinniarfiup piumasaqaatigisinnaavaa, lærlingitut isumaqatigiissuteqarsimanissaq imaluunniit suliffeqarfimmik sungiusarluni sulinissamik isumaqatigiissuteqarsimanissaq.

Imm. 2. Ilinniarfiup imm. 1-im i ilinnialernissamut piumasaqaatitut aalajangiunneqartunit allaanerusumik tunngaveqarlutik qinnuteqartut ilinnialernissaat akuerisinhaavaa, erseqqissumik naliliineq tunngavigalugu

nalilerneqarpat, qinnuteqartoq ilinniakkap naammassinissaanut ilinniakkamigut piginnaasaqartoq. Ilinniarfiup piumasarisinnaavai misilitsinnernik ingerlatsinissat, inuit ataasiakkaarlugit oqaloqatigineqarnissat imaluunniit qinnuteqaammik tunngavilersukkamik nassiusisoqarnissaa.

§ 29. Diplomitaarniarluni ilinnialernissamut piumasaavoq, ilinniakkamik ilinnialissutaasinnaasumik naapertuuttumik ilinniagaqarsimanissaq, minnerpaamik inuussutissarsiornermut akademimi ilinniakkap naligisaanik, tak. § 14, kiisalu diplomitaarniarluni ilinniakkamut tunngatillugu aalajangersarneqarsinnaasunik immikkut ilinnialernissamut piumasaqaataasinnaasunik naammassinninnissaq.

Imm. 2. Ilinniakkap ilinnialissutaasinnaasup naammassinerata kingorna, qinnuteqartut inuutissarsiummi sulinermik minnerpaamik ukiuni marlunni naapertuuttumik misilittagaqassapput. Suut inuutissarsiummi sulinermik naapertuuttumik misilittagaanerannik naliliineq, ilinniarfinnit isumagineqassaaq.

§ 30. Masteritut ilinnialernissamut piumasaavoq qinnuteqartup ilinniakkamik ilinnialissutaasinnaasumik naapertuuttumik ilinniagaqarsimanissa, minnerpaamik ima killifflimmik:

- 1) bacheloritut ilinniagaq, tak. § 11, imm. 1,
- 2) diplomitaarniarluni ilinniagaq, tak. § 15, imaluunniit
- 3) nunani allani ilinniagaq taakkua naleqqatigisaat, tak. nr. 1 aamma 2.

Imm. 2. Qinnuteqartut inuutissarsiummi sulinermik minnerpaamik ukiuni marlunni naapertuuttumik misilittagaqassapput. Suut inuutissarsiummi sulinermik naapertuuttumik misilittagaanerannik naliliineq, ilinniarfinnit isumagineqassaaq.

Imm. 3. Ilinniarfiup qinnuteqartut imm. 1-imi piumasaqaatinik naammassinninngitsut, kisiannili erseqqismik nalileereernerup kingorna taakkununnga ilinniakkatigut nallersuussinnaasumik ilinniagaqartutut nalilerneqartut, ilinnialertussatut akuerisinnaavai. Ilinniarfiup aalajangersinnaavaa, qinnuteqartup kingusinnerpaamik ilinniarnerup aallartinnerani naammattusaammik misilitsinnermi anguseqqaarnissaa.

§ 31. Ilinnialernissamut piumasaqaatinik sakkortunerulersitsineq, tak. §§ 21 aamma 26-30, atuutsitsilernissaq minnerpaamik ukiunik 2-nik sioqqullugu nalunaarutigineqartassaaq.

Imm. 2. Nalunaaruteqarluni ilisimatitsineq pissaaq ilinniarfiup pineqartup nittartagaani.

§ 31 a. Naalakkersuisut eqqumiitsuliornermk qaffasinnerusumik ilinniarfinni ilinniartussanik akuersinermut atatillugu ilinnialernissamut piumasaqaatinik saneqqutisoqarnissaa akuerisinnaavaat.

Imm. 2. Naalakkersuisut qaffasinnerusumik ilinniarfinni ilinnialernissamut akuerisaanissamullu malittarisassanik erseqqinnerusunik aalajangersaasinnaapput.

Kapitali 4

Ilinnialertussanik killilersuineq aamma ilinniartunngortitsinermi inissaqartitsineq

§ 32. Ilinniarfiit namminneq aningaasaqarnikkut sinaakkusiussat iluanni aalajangissavaat, ilinniartut qassit iliniakkani ataasiakkaani ilinniartunngortinniarnerlugit, taamaattoq tak. imm. 2 aamma 5 aamma § 9, nr. 3. Taamaattoq ilinniartut piffissaq tamaat ilinniakkami allami ilinnialersussatut akuerisaasimasut

ilinniartussatut akuerineqarsinnaanngillat, taamaaliornissamut immikkut illuinnartunik peqqutissaqaqtinnagu.

Imm. 2. Ilinniartunngortitsinermi inissaqartitsinerup aalajangiunnerani, ilinniarfiit qularnaassavaat, isumannaatsumik piginnaaneqarluartunillu ilinniartitsisoqarluni illutatigullu naammattunik inissaqartitsilluni ilinniartitsisoqarsinnaanissaa. Ilutigisaanik ilinniarfiit isiginiaassavaat, ilinniartussatut akuerineqartut amerlassusaasa inuaqatigiinni taamatut ilinniarsimasunik pisariaqartitsinernut naapertuuttuuneri.

Imm. 3. Ilinniarfiit ilinniartunngortitsinermi inissaqartitsinerup aalajangiunneranni, utaqqisut allassimaffianni tulleriaakkami utaqqisutut inissat qassiunissaat aalajangiussinnaavaat.

Imm. 4. Ilinniarfiit ilinniakkamik neqerooruteqarnissaq pinngitsoorsinnaavaat, qinnuteqartut amerlassusaasa taamaaliornissaq pissusissamisoortippassuk.

Imm. 5. Naalakkersuisut ilinniakkani ataasiakkaani ukiumut ilinniartunngortitsinermi inissaqartitsinerup amerlanerpaffissai aamma ikinnerpaaffissai aalajangersarsinnaavaat.

§ 33. Ilinniakkanut ataasiakkaanut qinnuteqartut, ilinniartunut inissanit amerlaneruppata, ilinniartunngortitsisoqassaaq tulleriaarinermi malittarisassat ilinniakkat ataasiakkaat aaqqissugaaneranni aalajangersarneqartut naapertorlugit.

Imm. 2. Qinnuteqartut utaqqisut allassimaffiannut ilanngunneqarsinnaapput, qinnuteqartut piginnaanillit ilinniartunut inissanit amerlaneruppata, tak. § 32, imm. 3.

§ 34. Ilinniartut ilinniakkami qinnuteqaatigisaminni ilinnialersinnaasut, piffissaliussap Naalakkersuisunit tamanut nalunaarutigineqartup iluani, ilinniarfiit nalunaarfingissavaat ilinniakkami inissamik neqeroorfigalugit.

Imm. 2. Qinnuteqartut ilinniakkami qinnuteqaatigisaminni ilinnialernissaminnut akuerisaanngitsut, imm. 1-imi piffissaliussap iluani tamanna pillugu ilinniarfinnit nalunaarfingineqassapput.

Imm. 3. Qinnuteqartut imm. 2-mi pineqartut, tulleriaarilluni utaqqisut allassimaffiannut ilanngunneqarsinnaasut, tak. § 33, imm. 2, tamanna pillugu, kiisalu utaqqisut allassimaffianni sumi inisisimanerminnik nalunaarfingineqassapput.

Imm. 4. Ilinniakkami inissaq neqeroorutigineqartoq, tak. imm. 1 aamma 3, atorunnaassaaq, qinnuteqartup ilinniakkami inissamik neqeroorutigineqartumik akuersinini upernarsaasinngippagu, piffissaliussap neqerooruteqarnerup ilinniarfimmit nalunaarutiginerani aalajangerneqartup iluani.

§ 35. Naalakkersuisut qaffasinnerusumik ilinniarfinni akuerisaanissamut malittarisassanik erseqqinnerusunik aalajangersaasinnaapput.

Kapitali 5

Aalajangersakkat allat

Ilinniagaqarluni Kalaallit Nunaata avataaniinneq

§ 36. Bacheloritut ilinniartut, tak. § 12, imm. 1, ilinniarnerup ingerlanerani ilinniarnerminnut atatillugu Kalaallit Nunaata avataani ilinniassapput, taamaattoq tak. imm. 2 aamma § 41, imm. 1. Ilinniarnermut

atatillugu nunami allamiinneq ima aaqqissuunneqarsinnaavoq:

- 1) semesteritut ilivitsutut,
- 2) ilinniartitsissutini ataasiakkaani imaluunniit
- 3) piffissaq sungiusarluni suliffik ataaseq amerlanerilluunniit.

Imm. 2. Imm. 1-im, oqaaseqatigiinni siullerni piumasaqaataasoq kandidatinngorniarluni ilinniartumut atuutissanngilaq bacheloritut ilinniartitaanermini pinngitsoorani nunap avataani ilinniagaqarsimanissamik kandidatitut ilinniarnissamik piumasaqaateqarfiusumi.

Imm. 3. Ilinniakkamut atatillugu nunami allamiinneq pillugu malittarisassat ilinniakkap pineqartup aaqqissugaanerani aalajangersarneqassapput.

Imm. 4. Inatsisartut inatsisaat manna naapertorlugu qaffasinnerusumik ilinniakkamut allanut, ilinniarfhit ilinniarnermut atatillugu pinngitsoorani nunami allamiittarneq, tak. imm. 1, pillugu malittarisassanik aalajangersaasinnaapput, taamaattoq tak. § 41, imm. 2. Malittarisassat ilinniakkap pineqartup aaqqissugaanerani ersissapput.

Imm. 5. Ilinniarfhit qinnuteqareernermikkut imm. 1-imik aamma malittarisassanik imm. 4 naapertorlugu aalajangersarneqartunik saneqqutsisinnaapput, pissutsit immikkut ittut tamanna pisariaqartippassuk, tamatumunnga ilanngullugit ilaqtariinni pissutsit, peqqissutsimut tunngasumik pissutsit, ilinniarnermut tunngatillugu pissutsit, ilinniagaqarluni nunanit tamanit misilittagaqarneq assigisaaluunniit.

Imm. 6. Ilinniartut imm. 5 naapertorlugu immikkut akuerineqartut, ilinniarnerup ingerlanissaanik allamik neqeroorfingineqassapput.

Ilinniartitsisut piginnaasaqarnissaannik piumasaqaatit

§ 37. Naalakkersuisut Inatsisartut inatsisaat manna naapertorlugu qaffasinnerusumik ilinniakkani ilinniartitsisut piginnaasaqarnissaannik piumasaqaatit pillugit malittarisassat aalajangersassavaat.

Ilitsersuisarneq

§ 38. Ilinniarfhit ilinniartut ilinniarnermik ingerlatsinerini ilinniakkamut kingornagullu suliffissanut periarfissaasunut tunngatillugu ilitsersorneqarnissamik neqeroorfingissavaat.

Imm. 2. Ilinniarfhit ilinniartut ilinniakkaminni piffissaliussaasumut sanilliullugu kinguartooqqasut immikkut ilitsersortassavaat, ilinniagaqartup ilinniakkaminik naammassinnissinnaanissaminut periarfissaasa tapersorsornissaat siunertaralugu.

Imm. 3. Naalakkersuisut ilitsersuisarneq pillugu malittarisassanik annertunerusunik aalajangersaasinnaapput.

Maalaaruteqartarneq

§ 39. Ilinniarfhit aalangiineri, ilinniartut imaluunniit qinnuteqartut inatsisitigut inissisimanerinut tunngasut, Naalakkersuisunut saqqummiunneqarsinnaapput. Maalaaruteqarneq pissaaq ullormit aalangiinerup maalaaruteqartumut nalunaarutigineraniit sapaatip-akunneri 4 qaangiutsinnagit.

Imm. 2. Maalaaruteqarneq kinguartitsinermik sunniuteqarsinnaanngilaq, taamaattoq tak. imm. 3.

Imm. 3. Naalakkersuisut maalaaruteqarnissamut periarfissat maalaarutilu sularineqartarnerat aamma maalaarutit aalajangersimasut kinguartitsinermik sunniuteqarsinnaanerat pillugit malittarisassanik aalajangersaasinnaapput.

Paasissutissanik nakkutilliineq pissarsiortarnerlu

§ 39 a. Naalakkersuisut ilinniakkat ilinniartitsinerlu Inatsisartut inatsisaat manna malittarisassallu taanna malillugu aalajangersarneqartut naapertorlugit nakkutigissavaat.

§ 39 b. Naalakkersuisut ilinniarfik, ilinniakkamut qinnuteqartut sulisullu pillugit paasissutissat pisariallit tamaasa ilinniarfeqarfinnit, qaffasinnerusumik ilinniakkamik neqerooruteqartunit piniarsinnaavaat, taamatuttaarlu nakkutilliinissaq kisitsisitigullu paasissutissanik suliaqarnissaq siunertaralugit ilinniarfeqarfinnut alakkarsinnaapput matumunngalu malittarisassanik aalajangersaasinnaallutik.

Imm. 2. Tassunga atatillugu Naalakkersuisut ilinniarfeqarfilla qaffasinnerusumik ilinniakkamik neqerooruteqartut akornanni elektroniskiusumik attaveqatigiinneq, tessunga ilanggullugit paasissutissanik tunniussinermut atatillugu qanoq ittuunissaat ilusissaallu pillugit malittarisassanik Naalakkersuisut aalajangersaasinnaanissaannut tungavissamik ilanggussisoqarsinnaassaaq. Aammattaaq Naalakkersuisut nakkutilliinissamut isumannaallisaanissamullu piumasaqaatinik aalajangersaasinnaapput.

Misileraalluni inerisaallunilu suliat

§ 39 c. Naalakkersuisut immikkut pisoqartillugu inatsit sanioqqussinnaavaat, tamanna misileraalluni sulinissap perorsaanikkullu inerisaanissap siuarsarnissaanik peqquteqarpat. Misileraalluni inerisaallunilu suliat ilinniartut ilinniakkaminnik inuussutissarsiummut ilinniakkamut, qaffasinnerusumik ilinniakkamut akuerineqarnissamut periarfissaannik allatigulluunniit pisinnaatitaaffinik ajornerulersitsinnginnissaat piumasaqaataavoq.

Imm. 2. Naalakkersuisut immikkorluinnaq ittunik pisoqartillugu ilinniartunut ataasiakkaanut tunngatillugu inatsit sanioqqussinnaavaat.

Atortuulersitsineq, atorunnaarsitsinermut ikaarsaariarnermullu aalajangersakkat

§ 40. Inatsisartut inatsisaat atortuulerpoq 1. august 2019.

Imm. 2. Ilutigisaanik atorunnaarsinnejarpooq Isumaginninnermi perorsaasussanik ilinniartitsineq pillugu Inatsisartut peqqussutaat nr. 2, 20. maj 1998-imeersoq aamma najoqqtassat taassuma nassatarisaanik atuutsinnejartut. .

§ 41. § 36, imm. 1 naapertorlugu nunami allamiinneq pillugu malittarisassat atuutinngillat ilinniartunut Inatsisartut inatsisaata atuutilernerata nalaani bacheloritut ilinniakkamik aallartitsisimasunut imaluunniit 1. august 2021 sioqqullugu bacheloritut ilinniakkamik aallartitsisunut.

Imm. 2. Qaffasinnerusumik ilinniakkamut allanut tunngatillugu pinngitsoorani ilinniarluni nunami allamiinnissaq pillugu malittarisassat, tak. § 36, imm. 4, taamaallaat atuutissapput ilinniartunut, ilinniakkani 1. august 2021-mi kingusinnerusukkulluunniit aallartittuni ilinniartuusunut.

Qaffasinnerusumik ilinniartitaanerit pillugit Inatsisartut inatsisaata allanngortinneqarnera pillugu
Inatsisartut inatsisaat nr. 15, 1. december 2021-mersooq (Eqqumiitsuliornermik qaffasinnerusumik
ilinniarfinni ilinnialernissamut piumasaqaatit, ilinniarnermut ileqqorissaarnermullu malittarisassat,
paasissutissanik nakkutilliineq pissarsortarnerlu aamma misileraalluni ineriertortitsinermillu suliaqarneq)
[1] imannak atuutilersitsinermut aalajangersakkamik imaqarpoq:

§ 2

Inatsisartut inatsisaat ulloq 1. januar 2022-mi atuutilissaaq.

*Ilinniartitaanermet, Kultureqarnermet, Timersornermet Ilageeqarnermullu Naalakkersuisoqarfik, ulloq 20. april
2023*

Karl Davidsen (atsior.)
Naalakkersuisoqarfimmi Pisortaagallartoq

/ Claus Kleemann (atsior.)

[1] Inatsimmi allannguineq § 1, imm. 2, 1. pkt., § 17 a, § 20, imm. 3, 1. pkt., § 31 a, § 35, § 39 a, § 39 b aamma §
39 c-mut tunngasuupput.

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut